

DI VIZIN E DI LONTAN

Nol pò jessi vêr che i sorestanz di un Stât a' fasin a pueste di governâlu malamentri o che vebin gust di fâ dutis lis robis ledrôsis. Dopo dut, al è ancje lôr interes di contentâ plui int che puedin, massime co la lôr permanenze sul cadreghin 'e dipent pôc o trop ancje de volontât dal popul. E alore si pò crodi che ancje il guviâr talian di cumò al cîri di fâ miôr ch'al pò par judâ lis centmil dibisugnis di cheste biade nazion.

Ma al à tre quatri pecjs tal mani che lu imberdein, in part ridadis dai guviârs passâz, in part nassudis de situazion di dopo la uere. La prime 'e je la venalitât vergonzôe de burocrazie che no si môf se no si onzin lis ruedis. E no si trate nome dal machinari metût adun sot la sceme dal manarin: si trate ancje dal personâl ch'al è dibot in ogni ufizi chel istes di prin, cun chê stesse mentalitât, cun chei stes vizis, e plen di speranze e di voe di conservâ dute la sô paronanze sul andament di dutis lis cjóssis.

Un'altre grande pecje 'e je chê di subordina dut al interes dal partît. E pazienze ancjmò se si cjalàs nome il vêr interes dal partît, che dopo dut al è l'interes di un grum di int: il mâl al è chest, che masse dispes si crôt che al sei interes dal partît chel ch'al è nome interes di une persone influente o di une criche di gramulons; e altris voltis si va daûr des ombris o dai scrupui di cualchidun ch'al viôt la code dal diaul in duc' i sîz, ch'al crôt di jessi svelt a fâ simpri l'incontrari di ce che oressin fâ chêi che son di un altri trôp.

Un'âltre ancjmò 'e je la pocje risuluzion dai parons dal vapôr che son simpri sclâs dal "tabù" nazionalistic, che no son rivâz adore di dispueâsi des superstizions patriotichis dal secul passât ne di chês dai "vinc'agn", che no viòdin une quarte di lâ dal nâs e invezzi di cirî l'interes coletif di uê e di doman, si lassin ancjmò indrezzâ di chel sproc militaristic e imperialistic che nus à menâz te buse.

Ma se ancje dutis chestis pecjs a' vignissin eliminadis, a'ndi restarâ un'âltre che bastares di bessole a fâ lâ strucje ogni buine intenzion e a strassâ malamentri la plui part des risorsis. E ancje cheste 'e je propr

Milions e miliarz a' jessin ogni dì des cassis dal Stât: millions miliarz nestrîs, gjavâz des nestrîs venis, parcè che il Stât nol è un cjamp di forment, ch'al bute un tant al an. Lavôrs publics, cuntribuzions, sovenzions par une opare o par chê âltre, par tignî in pîs barachis destinadis a sdrumâsi, par metint sù âltris provisoris che no podaran dâ ne zovâ, par contentâ mîl gramulis spalancadis, par fâ tasê mîl protestis e mîl lemenz. E cun ce criteri il guviâr fasial la sielte tra tantis domandis e tantis pressions? No cul criteri des plui grandis necessitâz nè premure nè de vere utilitât: ma nome cun chel de plui pôre e daûr de sburtadis di qualchi persone plui influent o daûr des onzudis plui bondantis di cui ch'al à plui... onzint. Dut al dipent di alzâ une vore vôs, magari fasint nassi qualchi disòrdin, o di vê un bon santul a Rome ch'al sepi mostrâ lis robis de bande juste. Cussì uê al ven sovenzionât un istitût, ch'al à salacôr mancûl dibisugne di âltris cent; al ven inviât lavôr colossâl di pocje o di nissune utilitât; al ven strassât un capitâl ae propagande nazionalistiche o a ingrassâ gjornai e rivistis in manssime fassisc', che spândin il lôr tuessin indulà che lares fate opare di pacificazion e di concuardie.

E cun dute la buine volontât, nol pò jessi diferent, fintremai che dut al partìs di Rome e dut al finìs a Rome. Rome 'e cognòs dutis lis robis par sintilis a dî: dut al dipent di savêlis contâ, di savê fâ viodi massime di savâ fâ pôre. Dut al dipent di vê lâ jù une buine vôs che zighi a fuart e che no si lassì mancjà il flât.

Cetantis carognadis o macacadis di mancul no vignaressino fûr se la sielte e la distribuzion 'e vignissin fatìs plui da vizin, sul puest, regjon par regjon, indulà che lis necessitâz e lis urgenzis a' puedin jessi cognossudis e misuradis diretamentri, e indulà che duc' si podares tignî di vôli la ministrazon di chêi miez ch'a son di duc'?

Patrie dal Friûl, n. 9, 1/15 di Mai 1950